

1800  
L E T T R E  
D' A V I S

D'VN MARCHAND  
de Cologne à vn Bourgeois  
de Paris, sur la marche du  
Cardinal Mazarin.

*De Cologne , ce dernier Novembre 1651.*

A P A R I S,

---

M. DC. LI.



LETTRE  
D'AVIS

DAN MARCHAND  
de Cologne à un Bourgeois  
de Paris, sur la marche du  
Cardinal Mazarin.

De Cologne, le dix-neuf Novembre 1651.

A PARIS,

---

M. DC. LI.





*LETTRE D'AVIS D'VN  
Marchand de Cologne à vn Bourgeois  
de Paris, sur la marche du Cardinal  
Mazarin.*

De Cologne ce dernier Nouembre 1651.



'Auis que ie vous donnay il y a quel-  
que temps du changement qui se de-  
uoit faire dans le Conseil & dans les Fi-  
nances, reüssit avec tant de bon-heur pour moy,  
que i'estime pouuoir en hazarder encore vn se-  
cond qui n'aura pas moins de verité, mais dont  
les conséquences sont beaucoup plus dangereu-  
ses: quand le corps sera joint à l'esprit, il n'y a  
rien que vous ne deuiez craindre, puisque le seul  
Esprit regnant dans le cabinet, vous a jetté aux  
bords de l'abyssme, dont la cheute est inéuitable  
par la durée d'une guerre Ciuille, telle que celle  
qui commence à s'allumer parmy vous, & qui  
pour vous en dire le vray, menasse, vos voisins d'y  
participer, si iamais l'on croid que nous ayons  
contribué ou par la retraitte que nous semblons  
donner à celuy qui en est l'Autheur, ou parce que  
nous ne vous aurons point appris quelles sont les

A ij



violentes entreprises qu'il forme contre vos biens  
 & vos vies. A Dieu ne plaîse que nostre Patrie qui  
 a tousiours esté libre par sa neutralité tombe dans  
 ce mal-heur, & soit coupable d'un si honteux  
 reproche, & que moy qui pour estre d'un rang  
 mediocre n'ay pas moins de jalousie pour la con-  
 servation d'un si cher priuilege, informé que ie  
 suis de toute cette conduite, ie manque à vous  
 descharger ma conscience, & à la posterité de la  
 connoissance d'un mal qui estant secouru peut  
 encore trouuer du remede; il consiste dans le  
 temps & tous les momens qui en sont precieux  
 depuis qu'il s'agit de trauailler à la cure d'un  
 grand corps comme est celuy de vostre Monar-  
 chie. Songez serieusement à faire que par vous-  
 mesme ou par autrui, tous vos Peuples sçachent  
 que depuis le bannissement du Cardinal Maza-  
 rin de vostre Cour, qu'il ne s'est parlé en ce pays  
 que des desseins qu'il faisoit de se venger & de se  
 reestabli: soit flatteurs ou interessez, il s'est trou-  
 ué des personnes qui luy ont persuadé qu'il le  
 pouuoit, pourueu qu'il peust jetter de la diui-  
 sion dans la Maison Royale, & du trouble par-  
 my les Peuples, l'un & l'autre luy a succédé, nous  
 voyons vn premier Prince du Sang reduit à dé-  
 fendre non plus sa liberté, mais sa vie, & tout le  
 Royaume qui crie misere & desolation: que pen-  
 sez-vous que fait le Cardinal Mazarin? il croid  
 auoir



auoir tout vaincu d'auoir esloigné le Prince de Condé & affoibly les peuples par la neccessité, il esleue son courage qui le porte à solliciter son retour auprès de leurs Maiestez tres Chrestiennes, tout d'un coup nous le voyons non plus comme vne personne proscripste & malheureuse, mais comme vn grand Ministre, pour qui la victoire & le triomphe se preparent, il est retourné à Dinan, où il reçoit des Ambassadeurs de tous endroits & des complimentz de plusieurs testes couronnées, sans que i'oublie plusieurs particuliers de France qui luy font croire que ce commerce si frequent qu'ils entretiennent avec luy, est vne porte assuree pour y r'entrer, i'en connois quelqu'une, & des lettres de change m'ont esté souuent enuoyées de Paris pour luy deliurer de l'argent en assez bonne quantité sans que i'aye iamais voulu tremper mes mains dans le sang de tant d'innocens, qui ne trouuailloient qu'à le rendre puissant pour leur oppression.

Ce que ie n'ay point voulu faire, d'autres l'ont entrepris, soit qu'ils y ayent notablement profité par le change, ou que l'on aye sollicité leur credit par l'esperance que l'on leur a donné d'agrandir leur personne, tant y a qu'il ne s'est pas plustost veu opulent, & aduoué de la Cour par les lettres patentes & particulieres qui luy ont esté enuoyées qu'il a commencé de distribuer des commissions



& argent sous le nom du Roy, pour la leuée de trois regimens de Caualerie & autant d'Infanterie. Icy ses amis ne luy ont point manqué, & par là vous connoistrez quels sont ses veritables adhérens, il ne leur a pas si tost communiqué ses intentions & le pouuoir qu'il auoit de les executer qu'ils ont couru aux moyens qui y apportoient quelque facilité. Faber, le Comte de Bourlemont, le Cheualier de Montaigu, & Manchini, Je n'oserois presque vous dire que deux de nos Liegeois s'y treuuent mal-heureusement enue-lopés, pour avec les autres s'employer sans aucune intermission à cet armement, de sorte que ces troupes iointes à celles de Neubourg que cette Eminence a achepté comptant, & qu'il fait approcher de luy, composent vn corps de huit mille hommes combattans, avec lequel ils se mettent en estat d'entreprendre toutes choses sans consideration ny de la iuste hayne de son A. R. ny des forces du Prince de Condé, ny des Arrests du Parlement, qui passent aupres des siens pour des chimeres, & auprès de luy pour vn digne sujet de sa vengeance. Je pourrois bien vous dire qu'auant de faire monter son ressentiment à cét excez qu'il n'a pas manqué de negociateurs aupres de son A. R. pour solliciter sa bonté, qu'il a voulu mesnager la retraite de Monsieur le Prince, mesme qu'il a suborné quelques chefs de vostre Senat, mais in-



geant que ceux cy ne pouuoient rien, contre la resolution ee Monsieur le Duc d'Orleans, & que la reconciliation estoit impossible avec le Prince de Condé, il a creu treuuer iustice dans les armes qu'il prepare. C'est à vous sur cet aduis, de prendre vos mesures & soyés persuadé que quelque railerie que l'on en fasse à Paris, ce que ie vous mande doit paroistre au iour de Noel par l'assemblée de ses troupes près la Bassée où vous pouués sçauoir qu'elles ont leur rendez vous: il n'attend plus la commission de Generalissime, elle luy a esté enuoyée en bonne forme, Signée de Lomenie, avec toutes les circonstances d'honneur que vous sçauriez vous imaginer. Le Mareschal d'Hoquincourt qui doit ce tiltre aux soins de cette Eminence, avec les gens qu'il a en Picardie commandera en qualité de General, Faber & Manicanp Lieutenants Generaux, Naualler & le Comte d'Estrez Mareschaux de Camp, l'Artillerie se prendra dans Sedan, & l'équipage s'en doit faire icy tres commodement & avec d'autant plus de facilité que l'argent n'y est point espargné.

Ie vous ay fait ce detail pour qu'à l'euuenement vous iugies bien de mes aduis, & que s'il m'arriue iamais de vous en donner, ou que l'usage que vous en ferés vous soit auantageux & à vostre Patrie, vous croyez que Dieu veille tousiours pour la conseruation des Monarchies qu'il a establies en



les defendant des tyrans qui s'eluent de temps  
en temps pour leur destruction, delá que vous  
tirez sujet de rendre des actions de graces à la  
bonné qui vous fait preuoir le mal pour l'esuiter  
ie souhaite que vous ny les vostres, vous ne soyés  
pas si paresseux à embrasser les moyens qui vous  
sont presents pour vous defendre de ce monstre  
qui ne rentre sur vos terres que pour vous deuor-  
rer, que vous tesmoignastes de molesse à vous  
ioindre aux bonnes intentions de son A. R. & de  
Monfieur le Prince, pour vous opposer à l'ele-  
uation de certains Ministres & fauteurs du dessein  
qui vo<sup>r</sup> paroist aujourd'huy, que le ioug vous fait  
gémir & vous prepare de plus cruelles peines: si  
nous auions vos forces, ou que vous fussiez aussi  
resolus que nous le sommes dans nostre petit can-  
ton, iamais pourpre ny Eminence ne sortiroit de  
Rome pour le respendre dans les Royaumes, &  
avec eux les semences d'ambition pour le cōman-  
dement; ils ne feroient pas du Chapeau vn azile à  
leurs crimes & n'en souilleroient point la sacre par  
leurs mauuaises pratiques, mais ce n'est point  
mon dessein déplucher la vie de ces Eminentes  
personnes, ny de penetrer les mouuemens de leur  
ame, cette reflexion est au dessus de mon cōmerce  
& i'en scauray tousiours assez, quand ie ne scauray  
qui dresser vne lettre de creance & vous dire que  
ie suis.

M. Vostre tres-humble & tres aff. cionné seruiteur, N L.